

REGIONAL NEWS UNIT
ALL INDIA RADIO, AGARTALA

Date: 28-05-2025

Time: 07:55-08:05 PM Hrs
BENGALI EVENING BULLETIN

Headlines :

- (১) কৃষিমন্ত্রী রতন লাল নাথ জানিয়েছেন আগামীকাল থেকে রাজ্যে বিকশিত কৃষি সংকল্প অভিযান" কর্মসূচি শুরু হচ্ছে ।
- (২) অর্থনৈতিক বিষয়ক মন্ত্রিসভা কমিটি ২০২৫-২৬ বিপণন মরশুমের জন্য চৌদ্দটি খরিফ ফসলের ন্যূনতম সহায়ক মূল্য বৃদ্ধির অনুমোদন দিয়েছে ।
- (৩) ঘরোয়া তৃতীয় ডিভিশন লিগ ফুটবল প্রতিযোগিতার ফাইনালে উত্তর বাধারঘাটের স্বামী বিবেকানন্দ ক্লাব খেলবে ভাটি অভয়নগরের বিবেকানন্দ ক্লাব ।
- (৪) আজ থেকে ৩১শে মে পর্যন্ত রাজ্যে ঝড়ো হাওয়া সহ অতি ভারী বৃষ্টিপাতের সতর্কতা জারি করেছে আবহাওয়া দপ্তর ।

Agriculture Minsiter :

আগামীকাল দেশব্যাপী "বিকশিত কৃষি সংকল্প অভিযান" অধিবেশন শুরু হচ্ছে। কৃষিমন্ত্রী রতন লাল নাথ জানিয়েছেন আগামীকাল থেকে রাজ্যে বিকশিত কৃষি সংকল্প অভিযান" কর্মসূচি শুরু হচ্ছে। এই কর্মসূচি ১২ই জুন পর্যন্ত চলবে। আজ মহাকরণে সাংবাদিক সম্মেলনে তিনি একথা জানান। তিনি জানান, ১, ৭ এবং ৮ই জুন এই তিন দিন বাদে বাকি দিনগুলিতে রাজ্যের ৮৬৪টি স্থানে "বিকশিত কৃষি সংকল্প অভিযান" কর্মসূচি অনুষ্ঠিত হবে।

MSP :

অর্থনৈতিক বিষয়ক মন্ত্রিসভা কমিটি ২০২৫-২৬ বিপণন মরশুমের জন্য চৌদ্দটি খরিফ ফসলের ন্যূনতম সহায়ক মূল্য বৃদ্ধির অনুমোদন দিয়েছে। আজ তথ্য ও সম্প্রচার মন্ত্রী অশ্বিনী বৈষ্ণো নতুনদিল্লিতে সংবাদমাধ্যমকে বলেন, কৃষকদের উৎপাদিত পণ্যের লাভজনক মূল্য নিশ্চিত করার জন্য সরকার ২০২৫-২৬ বিপণন মরশুমের জন্য খরিফ ফসলের এমএসপি বৃদ্ধি করেছে। গত বছরের তুলনায় সর্বোচ্চ এমএসপি বৃদ্ধির সুপারিশ করা হয়েছে নাইজার বীজ বা কালো তিলের জন্য প্রতি কুইন্টাল ৮২০ টাকা, তারপরে রাগির জন্য প্রতি কুইন্টাল ৫৯৬ টাকা, তুলার জন্য ৫৮৯ টাকা এবং তিলের জন্য প্রতি কুইন্টাল ৫৭৯ টাকা।

#####Byte- Ashwini Vaishnaw#####

PM, tour :

প্রধানমন্ত্রী নরেন্দ্র মোদী আগামীকাল সিকিম, পশ্চিমবঙ্গ, বিহার এবং উত্তরপ্রদেশে দু'দিনের সফরে যাবেন। সফরকালে তিনি ৭০,০০০ কোটি টাকারও বেশি মূল্যের একাধিক উন্নয়ন প্রকল্পের উদ্বোধন, উৎসর্গ এবং ভিত্তিপ্রস্তর স্থাপন করবেন। সিকিমে, প্রধানমন্ত্রী “Sikkim@50: Where Progress meets purpose and nature nurtures growth” কর্মসূচিতে অংশগ্রহণ করবেন। তিনি রাজ্যে একাধিক উন্নয়ন প্রকল্পের ভিত্তিপ্রস্তর স্থাপন এবং উদ্বোধন করবেন এবং এই উপলক্ষে জনসভায় ভাষণ দেবেন। শ্রী মোদী রাজ্য প্রতিষ্ঠার ৫০ বছর পূর্তি উপলক্ষে স্মারক মুদ্রা এবং ডাকটিকিটও প্রকাশ করবেন। প্রধানমন্ত্রী পশ্চিমবঙ্গে আলিপুরদুয়ারের আলিপুরদুয়ার এবং কোচবিহার জেলায় সিটি গ্যাস বিতরণ প্রকল্পের ভিত্তিপ্রস্তর স্থাপন করবেন। এছাড়াও, তিনি বিহারে পাটনা বিমানবন্দরের নতুন টার্মিনাল ভবন উদ্বোধন করবেন।

Awareness Program-Sepahijala :

মিশন বাৎসল্যের আওতায় বেটি বাঁচাও বেটি পড়াও কর্মসূচির অঙ্গ হিসেবে আজ সিপাহীজলা জেলার সোনামুড়া মহকুমার কাঁঠালিয়া কমিউনিটি হলে অনুষ্ঠিত হয়েছে বাল্যবিবাহ ও কিশোরী গর্ভাবস্থার কুফল সম্পর্কে এক সচেতনতামূলক আলোচনা সভা। কাঁঠালিয়া ICDS প্রকল্পের উদ্যোগে আয়োজিত এই অনুষ্ঠানে উপস্থিত ছিলেন সিপাহীজলা জিলা পরিষদের সহকারী সভাপতি পিন্টু আইচ ,কাঁঠালিয়া ব্লকের বিডিও অভিজিৎ দাস, যাত্রাপুর থানার ও.সি সুরত দেবনাথ প্রমুখ।

Anti-tobacco Campaign :

দক্ষিণ ত্রিপুরা জেলা তামাক নিয়ন্ত্রণ সেলের তত্বাবধানে আজ বিলোনিয়া মহকুমার মতাই বাজার এবং আশেপাশের স্কুল এলাকায় তামাক বিরোধী অভিযান চালানো হয়। স্বাস্থ্য দপ্তর এবং বিলোনিয়া থানার যৌথ উদ্যোগে তামাক নিয়ন্ত্রণ আইন সম্পর্কে স্থানীয় মানুষ ও ব্যবসায়ীদের সচেতন করা হয়।

PM Savarkar :

প্রধানমন্ত্রী নরেন্দ্র মোদী বীর সাত্তারকরের জন্মবার্ষিকীতে শ্রদ্ধা জানিয়েছেন। নিজের সামাজিক মাধ্যমে তিনি বলেছেন, স্বাধীনতা সংগ্রামে বীর সাত্তারকরের অবদান উন্নত ভারত গড়ে তোলার লক্ষ্যে দেশের কাছে প্রেরণা স্বরূপ।

Yellow Capsicum :

পরীক্ষামূলকভাবে হলুদ বেলপেপার চাষ করে সফলতা লাভ করেছে কৈলাশহরের কৃষি বিজ্ঞান কেন্দ্র। উনকোটি জেলায় এই প্রথম জারুলতলীস্থিত কৃষি বিজ্ঞান কেন্দ্রের নিজস্ব জমিতে এই অর্থকরী ফসল চাষ করা হয়েছে। গ্রীণ হাউজে এই ফসলের চাষের জন্য কৃষি বিজ্ঞান

কেন্দ্র থেকে কৃষকদের উৎসাহিত করা হচ্ছে। কৈলাশহর কৃষি বিজ্ঞান কেন্দ্রের উদ্যান বিজ্ঞানী রতন দাস জানান, ইতিমধ্যেই জেলার ত্রিশজন কৃষক প্রদর্শনীমূলক চাষের ক্ষেত্র পরিদর্শন করেছেন।

BBCET-2025 :

খয়েরপুরস্থিত বীর বিক্রম কলেজ অফ ফার্মাসিতে আগামী দোসরা জুন কমন এন্ট্রান্স টেস্ট অনুষ্ঠিত হবে। আবেদনপত্র জমা দেবার শেষ তারিখ ৩১শে মে। পরীক্ষার্থীদের www.birbikramgroup.com ওয়েবসাইটে থেকে বিস্তারিত জানার জন্য কলেজ কর্তৃপক্ষ অনুরোধ জানিয়েছে।

Press-Meet :

S.F.I এর ২১তম রাজ্য সন্মেলন আগামী ৩০ এবং ৩১শে মে কৈলাশহর টাউন হলে অনুষ্ঠিত হবে। সন্মেলনে উপস্থিত থাকবেন, প্রাক্তন মুখ্যমন্ত্রী মানিক সরকার, বিরোধী দলনেতা জিতেন্দ্র চৌধুরী, এস.এফ.আই এর সর্বভারতীয় সম্পাদক ময়ূখ বিশ্বাস প্রমুখ।

Jana Satabdi Train :

বিদ্যুৎ চালিত ইঞ্জিন দিয়ে জনশতাব্দী এক্সপ্রেস ট্রেন আগরতলা ও শিলচরের অরুণাচল স্টেশন পর্যন্ত নিয়মিতভাবে চলাচল শুরু করেছে। সপ্তাহে তিন দিন সোম, বুধ, শুক্র আগরতলা থেকে এই বিদ্যুৎ চালিত ট্রেনটি যাতায়াত করছে। আজ সকালে ট্রেনটি যথারীতি অরুণাচল স্টেশনের উদ্দেশ্যে যাত্রা করে। জানিয়েছেন রেলের আগরতলা স্টেশন মাস্টার চন্দ্রমোহন শাহ।

Abhoy Mission-Sepahijala :

বিশালগড়ের গোকুলনগরস্থিত অভয় মিশনের উদ্যোগে আজ সিপাহীজলা জেলাভিত্তিক বর্ষবরণ অনুষ্ঠানের আয়োজন করা হয়। উদ্বোধন করেন সিপাহীজলা জিলা পরিষদের সভাধিনেত্রী সুপ্রিয়া দাস দত্ত। অনুষ্ঠানে অভয় মিশনের কচিকাঁচা দিব্যঙ্গ আবাসিকদের পাশাপাশি স্থানীয় শিল্পীরা সাংস্কৃতিক অনুষ্ঠান পরিবেশন করে।

Football :

ত্রিপুরা ফুটবল এসোসিয়েশন পরিচালিত ঘরোয়া তৃতীয় ডিভিশন লিগ ফুটবল প্রতিযোগিতার ফাইনালে উত্তর বাধারঘাটের স্বামী বিবেকানন্দ ক্লাব খেলবে ভাটি অভয়নগরের বিবেকানন্দ ক্লাবের বিরুদ্ধে। আগামী ৩ জুন নির্ণায়ক ম্যাচটি হবে। আজ এ-গ্রুপে গুরুত্বপূর্ণ খেলায় বিবেকানন্দ ক্লাব জয়লাভ করেছে। উমাকান্ত মিনি স্টেডিয়ামে বিকালে অনুষ্ঠিত খেলায় বিবেকানন্দ ক্লাব ১-০ গোলে ইকফাই ফুটবল ক্লাবকে হারিয়ে দেয়।

JC Cricket :

টিসিএ পরিচালিত জেসি মেমোরিয়াল লিগ ক্রিকেট প্রতিযোগিতায় ব্লাডমাউথ ক্লাবের বিরুদ্ধে প্রথম ইনিংসে লিড নিয়েছে স্ফুলিঙ্গ ক্লাব। নরসিংগড়ের পিটিএ মাঠে তিনদিনের ম্যাচে ব্লাডমাউথ ক্লাব ৯ উইকেটে ২৪৯ রান থেকে দ্বিতীয় দিনে খেলতে নেমে প্রথম ইনিংসে সবকটি উইকেট হারিয়ে ২৫২ রান করে। জবাবে স্ফুলিঙ্গ ক্লাব প্রথম ইনিংসে লিড নিয়ে দিনের শেষে ৬ উইকেট হারিয়ে ৩২৮ রান করে। এদিকে, এম বি বি স্টেডিয়ামে তিনদিনের অপর ম্যাচে ইউনাইটেড ফ্রেন্ডস ৪ উইকেটে ৯৭ রান থেকে দ্বিতীয় দিনে খেলতে নেমে প্রথম ইনিংসে সবকটি উইকেট হারিয়ে ৩১৯ রান করে। জবাবে সংহতি ক্লাব প্রথম ইনিংসে দিনের শেষে ১ উইকেট হারিয়ে ১৪৩ রান করে।

Weather :

আজ থেকে ৩১শে মে পর্যন্ত রাজ্যে ঝড়ো হাওয়া সহ অতি ভারী বৃষ্টিপাতের সতর্কতা জারি করেছে আবহাওয়া দপ্তর। এই পরিপ্রেক্ষিতে সম্ভাব্য প্রাকৃতিক দুর্যোগ মোকাবেলায় প্রস্তুত থাকার জন্য রাজস্ব দপ্তর থেকে রাজ্যের সব জেলার জেলাশাসকদের সতর্ক করে দেওয়া হয়েছে।

আজ আবহাওয়া দপ্তরের পক্ষ থেকে জানানো হয়েছে, আগামী ২৪ ঘন্টায় রাজ্যের সব জেলায় ভারী থেকে অতি ভারী এবং বজ্রবিদ্যুৎ সহ ঘন্টায় ৪০ থেকে ৫০ কিলোমিটার বেগে ঝড়ো হাওয়া বয়ে যাওয়ার সতর্কতা জারি করা হয়েছে। আগামীকাল সর্বোচ্চ তাপমাত্রা ২৯ ডিগ্রি সেলসিয়াস এবং সর্বনিম্ন ২৫ ডিগ্রি সেলসিয়াসের কাছাকাছি থাকবে। আজ দিনের সর্বোচ্চ তাপমাত্রা ছিল ৩৪.২ ডিগ্রি সেলসিয়াস এবং সর্বনিম্ন ২৭.২ ডিগ্রি সেলসিয়াস।
